

19 Fu posto, per sier Domenego Trivixan el cavalier procurator, sier Polo Capello el cavalier, sier Luca Trun, sier Andrea Griti procurator, savii dil Consejo, sier Andrea di Prioli, sier Francesco Constarini savii a Terra ferma, sier Hironimo Zane, sier Lodovico Michiel, sier Zuan Barbarigo et sier Alberto Badoer savii ai Ordeni, non era sier Zorzi Corner el cavalier procurator, qual non si sente: che a li oratori di la università di Candia, a li capitoli apresentadi, sia risposto che semo ben contenti acetarli et darli li ducati 600 al mexe per il fabrichar de quella terra, come in li capitoli se contien; ma quanto a li pizoli 8 al zorno voleno dar, che meglio saria li desseno di contadi et pagar di danari quelle opere lavorerano etc.

Et a l'incontro, sier Polo Capelo el cavalier, sier Luca Trun, sier Francesco Bragadin savii dil Consejo, sier Valerio Marzelo savio a Terra ferma, et sier Thomà Lippomano savio ai Ordeni, voleno la parte *ut supra*; ma quanto al capitolo di pizoli 8 al zorno, che rimetemo a loro adati questa cossa al meglio potranno.

Et parlò prima per la soa opinion sier Polo Capelo el cavalier, qual è in settimana. Li rispose sier Domenego Trivixan el cavalier procurator, savio dil Consejo, e fece bona renga, et chiari el tutto. Li rispose sier Luca Trun, qual ste' longamente in renga et fece lezer molte parte prese in questa materia, zercha el fabrichar et fortificar di Candia *ut in eis*. Venuto zoso, senza farli altra risposta, andò le do opinion. 138 dil Trevixan, 35 dil Capelo et altri, et fo comandà gran credenza de le disputation fate.

19* A dì 8, Domenega, in Colegio non fo cossa da conto. *Solum, di Zara, di sier Piero Marzelo conte et sier Zuan Nadal Salamon capitano, di 29 Zugno*. Come in quel zorno, a hore è stà un grandissimo terremoto, qual ha ruinato le torre di la Vrana et stesso il muro e fato gran danno, dove è castelan sier

Da poi disnar, fo grandissimo caldo. Fu Gran Consejo, vicedoxe sier Marco Minio, per esser andato sier Andrea Mudazo fuora di la terra. Fu fato varie voxe. Tutte passoe, dà Consejo di X et Pregadi in fuora.

Fo leto una gratia di uno Paestrina di Chioza, vol certo stabele conditionato.

1520, die 9 Julii, in Consilio Quadrageinta 20
ad criminalia.

Sier Marcus Zeno, sier Leonardus de Molino,
Capita de Quadrageinta.

Da alcuni anni in qua, sono stà intermesse le electione di alcune castelanie et lochi di fuori, che per avanti sempre si solevano far per il Mazor Consejo; il che si può ragionevolmente attribuir a li impedimenti di le guerre preterite. Ma ora è ben conveniente ritornar le cose a li primi et debiti soi termini, quali non si possano alterar senza l'autorità dei Consigli, et però:

L'anderà parte, che tutte le infrascritte castelanie et lochi de fuori, che far si solevano per il nostro Mazor Consejo avanti la guerra proxima, far si debano per el medesimo modo et forma come per avanti, excepti quei lochi solamente li quali, per deliberation de i Consigli nostri, fusseno stà revocate over suspese le eletione sue, come è ben conveniente. Et da mo' sia preso: che ne lo advenir non si possa più impedir le eletione che ordenariamente si dieno far per il Mazor Consejo, salvo con expressa deliberation de li Consigli nostri. Le electione adunque de i lochi che si debono fare sono queste, *videlicet*:

Castelan a Feltre.
Castelan a la Scala.
Do castelani nel Castel vechio a Verona.
Castelan di San Piero di Verona.
Castelan a Lignago.
Castelan a Castel Baldo.
Podestà a Loredò.
Castelan a Nogaruoła.
Castelan a Bre' di Valchamonicha.
Castelan di la citadela di Bergamo.
Castelan a Cologna.
Capitano di la citadela di Verona.

Le altre castelanie veramente e lochi, concesse per gratia a tempo, far similmente si debano *immediate* finito se sarà di adempir cadauna di esse gratie, e però sia preso: che tutti che hanno de simel gratie, over concessione, debano, da mo' a mexi uno proximo, aver apresentà al fidelissimo nodaro di la cancelaria nostra Daniel Vido a questo deputato, cadauno la gratia over concession sua, aziò che, passato il tempo di quella, si possa far in loco suo; al- 20*
tramente, passato el ditto mexe preditto, siano e